




ГОРХИ-ТЭРЭЛЖИЙН БАЙГАЛИЙН ЦОГЦОЛБОРТ ГАЗРЫН
ХАМГААЛАЛТЫН ЗАХИРГАА



ГОРХИ-ТЭРЭЛЖИЙН БАЙГАЛИЙН ЦОГЦОЛБОРТ ГАЗАРТ АЯЛАХ,
УУЛ ОВОО ТАХИХ, УЛАМЖЛАЛТ ЗАН ҮЙЛИЙН ЁСЛОЛ
ҮЙЛДЭХ ЖУРАМ

2018 ОН

ГОРХИ-ТЭРЭЛЖИЙН БАЙГАЛИЙН ЦОГЦОЛБОРТ ГАЗАРТ АЯЛАХ, УУЛ ОВОО ТАХИХ, УЛАМЖЛАЛТ ЗАН ҮЙЛИЙН ЁСЛОЛ ҮЙЛДЭХ ЖУРАМ

НЭГ. НИЙТЛЭГ ҮНДЭСЛЭЛ

1.1. Тусгай хамгаалалттай газар нутагт хамгаалалтын горим дэглэмийг мөрдүүлэх, тогтоосон маршрутын дагуу аялах болон уул овоо тахих, уламжлалт зан үйлийн ёслол үйлдэх, хамгаалалтын хэвийн үйл ажиллагааг хангуулах харилцааг зохицуулахад энэхүү журмын зорилго оршино.

1.2. Энэхүү журам нь Монгол Улсын Байгаль орчныг хамгаалах тухай, Тусгай хамгаалалттай газар нутгийн тухай хууль, Хог хаягдлын тухай хууль, тэдгээртэй нийцүүлэн гаргасан журам, эрх зүйн бусад акт болон хамгаалалтын захиргааны менежментийн төлөвлөгөө, аялал жуулчлалын төлөвлөгөөтэй нийцсэн байна.

ХОЁР. ТОГТООСОН МАРШРУТЫН ДАГУУ АЯЛАХ БОЛОН ЗӨВШӨӨРӨГДСӨН ҮЙЛ АЖИЛЛАГАА

2.1. Төрийн тахилгаас бусад тохиолдолд иргэн, аялагчид тогтоосон маршрутын дагуу аялана.

2.2. Горхи-Тэрэлжийн байгалийн цогцолборт газарт аялагчид “Туул” мэдээлэл, сурталчилгааны төвийн дэргэдэх нэвтрэх цэгээс тасалбар авна. Энэхүү тасалбарыг авсанаар аялалын зөвшөөрөл олгогдсонд тооцно.

2.3. Спорт, урлагийн болон бусад нийтийг хамарсан арга хэмжээ зохион байгуулахдаа хамгаалалтын захиргаанд хүсэлт ирүүлж, зөвшөөрөл авна. Хүсэлтэд зохион байгуулагч байгууллагын нэр, хаана, хэдэн хүн оролцох арга хэмжээг ямар хугацаанд зохион байгуулах зэргийг мэдээллийг багтаахаас гадна байгаль хамгаалах, галын аюулгүй байдлыг хангах талаар дурдсан байна.

2.4. Аялагчид нь зөвшөөрөгдсөн амрах, отоглох цэгт байгальд орчинд сөрөг нөлөөгүй аргаар шийдсэн, зөөвөрлөх боломжтой майхан, отоглох гэр барьж болно.

2.5. Горхи-Тэрэлжийн байгалийн цогцолборт газрын “Агуй хад”, “Мэдхий хад”-ны орчинд амрах цэгт тээврийн хэрэгслийг түр хугацаагаар байрлуулж болно.

2.6. Иргэн, аялагчид ердийн хөсөг болон явганаар аялахдаа хөтөчтэй, батлагдсан маршрутын дагуу аялана.

2.7. Аялагч нь байгаль орчин, түүх соёлын дурсгалыг хамгаалах, үл хөндөх үүрэг хүлээнэ.

2.8. Аялалын явцад түүх, соёлын эд өлгийн зүйлс олдсон тохиолдолд Байгаль орчны асуудал эрхэлсэн болон Соёлын асуудал эрхэлсэн төрийн захиргааны төв байгууллага, Горхи-Тэрэлжийн байгалийн цогцолборт газрын хамгаалалтын захиргаанд нэн даруй мэдээлнэ.

ГУРАВ. УУЛ ОВОО ТАХИХ, УЛАМЖЛАЛТ ЗАН ҮЙЛ ХИЙХ

3.1. Горхи-Тэрэлжийн байгалийн цогцолборт газарт уул овоо тахих, уламжлалт зан үйл хийхдээ хамгаалалтын захиргаанд урьдчилан мэдэгдэж, байгаль орчны хууль

тогтоомжуудыг мөрдөж ажиллах, гал түймрийн аюулгүй байдлын батлагаа гаргаж, зөвшөөрөл авсан байна.

3.2. Уул овоо тахих ёслолыг тухайн уулын бэлд үйлдэнэ.

3.3. Уул овоонд цаас, хуванцар саванд боогоогүй хүнс, цагаан идээгээр цацал өргөж болно.

ДӨРӨВ. ХАМГААЛАЛТЫН ЗАХИРГААНЫ ҮҮРЭГ

4.1. Хамгаалалтын захиргаа нь батлагдсан маршрутын дагуу отоглох, хоноглох болон түр амрах цэгүүд, замын тэмдэг, тэмдэглэгээг бусад аж ахуйн нэгж, байгууллага, иргэдтэй хамтран стандартын дагуу хийж тохижуулна.

4.2. Хамгаалалтын захиргаа нь хамгаалалтын горим, дэглэмийг сахиулан, гадаад, дотоодын аялагч, амрагчдыг байгалийн цогцолборт газрын талаар танилцуулга, гарын авлага, материалаар хангах, мэдээллийн төвөөр үйлчлэх.

4.3. Отоглох, хоноглох болон түр амрах цэгүүдийн хог хаягдлын менежментийг нутгийн иргэдийн нөхөрлөлтэй хамтран зохион байгуулна.

ТАВ. АЯЛАЛЫН ЭРҮҮЛ АХУЙ, АЮУЛГҮЙ АЖИЛЛАГАА

5.1. Батлагдсан маршрутын дагуу аялах, уул овоо тахих, уламжлалт зан үйл үйлдэхдээ эрүүл ахуй, аюулгүй ажиллагааны дэглэмийг мөрдөнө.

ЗУРГАА. ХОРИГЛОХ ҮЙЛ АЖИЛЛАГАА

6.1. Аялах, зан үйл үйлдэх үед дараах үйл ажиллагааг хориглоно:

6.1.1. “Тусгай хамгаалалттай газар нутгийн тухай” Монгол улсын хууль болон тухайн газрын хамгаалалтын нийтлэг горим, байгаль хамгаалах бусад хууль тогтоомжийг зөрчсөн үйл ажиллагаа явуулах;

6.1.2. Үзэгдэх орчныг халхалсан, түүний сүр бараа дарах, салхинд хийсч унах, хог хаягдал үүсгэж болзошгүй шон, самбар байрлуулах, туг далбаа хатгах, хадаг уях, овоо босгох;

6.1.3. цаг агаарын хүндрэлтэй үед /гол үертэй, үргэлжилсэн бороотой, хүчтэй салхи, шуургатай/ аялах;

6.1.4. Аялалын явцад хөтөчийн зааврыг үл хүндэтгэж зорчих;

6.1.5. Тогтоосон зам чиглэл, амрах, отоглох цэгийг дур мэдэн өөрчлөх, тогтоосноос бусад газарт ил задгай гал түлэх болон үнс нурмаа унтраахгүй орших;

6.1.6. ан амьтан агнах, барих, үргээх, тэдгээрийн үүр, ичээ, нүх, ноохойг хөндөх, эвдэж сүйтгэх;

6.1.7. ургаа мод, хад, чулуу, булаг, шанд, гол усны эхэнд хадаг самбай уях;

6.1.8. зөвшөөрөлгүйгээр байгалийн дагалт баялаг ашиглах, хөрс, ус болон байгалийн баялгаас дээж авах;

6.1.9. түүх соёлын дурсгалт зүйлсийг гэмтээх, байрнаас нь хөдөлгөх, устгах;

6.1.10. Зөвшөөрөгдсөн цэгээс бусад газарт ил задгай гал түлэх;

6.1.11. Хог хаягдалыг хогийн сав болон тогтоосон цэгээс бусад газарт хаях, шатаах;

6.1.12. тусгай хамгаалалттай газрын хамгаалалтын захиргааны байгаль хамгаалагч, төрийн тусгай албаны албан хаагчдаас бусад хүн галт зэвсэг биедээ авч явах;

6.1.13. аялалын явцад гол горхийг бохирдуулах, усанд хоол хүнс, органик материал, хог хаягдал, химийн болон ариун цэврийн бодис оруулах, зэрлэг ан амьтан татахуйц хурц үнэртэй хоол, хүнс хэрэглэх;

6.1.14. аялалын явцад ургаа мод хугалах, огтлох, хөрөөдөх, цэцэг түүх, ургамлын үндэс ухах, зөвшөөрөлгүй самар, жимс, мөөг түүх, зөвшөөрөгдөөгүй цэгт гал түлэх, галын наадам хийх, шувууны үүрт сүүдрээ тусгах, зэрлэг ан амьтан, жигүүртэн, загас жараахайг хооллох;

6.1.15. мод, хад чулуу, байгууламж дээр бичих, сараачих, зураг зурах, байгалийн унаган өнгө төрхийг алдагдуулах;

6.1.16. металл хайгч, судалгааны, хайгуулын багаж, тоног төхөөрөмж авч явах;

6.1.17. зөвшөөрөлгүй судалгаа, шинжилгээний ажил хийх, зураг авах, бичлэг хийх;

6.1.18. Тусгай хамгаалалттай газар нутгийн тухай хуулийн 12.8-д заасны дагуу хамгаалалтын захиргаанаас урьдчилан авсан зөвшөөрөлгүйгээр нислэг үйлдэх;

6.1.19. энэ журмын 2.3 дах хэсэгт зааснаас бусад байгууламж барих,

6.1.20. газар хагалах, ухах, элс, хайрга чулуу авах, мод, зэгс, шагшуурга бэлтгэх, хязгаарлалтын бүсээс бусад газарт зам тавих зэргээр байгалийн төлөв байдлыг өөрчлөх;

6.1.21. хуульд заасан бусад хориглосон үйл ажиллагаа;

ДОЛОО. БУСАД ЗҮЙЛ

7.1. Энэхүү журмыг зөрчсөн иргэн, хуулийн этгээдэд холбогдох хууль тогтоомжид заасны дагуу хариуцлага тооцно.

7.2. Хамгаалалтын захиргааны дарга, мэргэжилтэн, байгаль хамгаалагч нь энэхүү журмын хэрэгжилтэд хуульд заасан эрх, үүргийн дагуу хяналт тавьж ажиллана.

Журмыг хууль тогтоомж, эрх зүйн актад нийцүүлэн боловсруулсан болно.

ГОРХИ-ТЭРЭЛЖИЙН БАЙГАЛИЙН ЦОГЦОЛБОРТ ГАЗАР

2018 он